



Vschinauncha da S-chanf
7525 S-chanf



Da la suprastanza cumünela avuost 2019

Preschantaziun da l'analisa d'alp

La suprastanza cumünela piglia cugnuschentscha da la preschantaziun da l'analisa d'alp da la vschinauncha da S-chanf. Pünavaunt vain preschanteda quista analisa in settember 2019 a la societad d'alp (*Societad pasculs ed alps*) ed als 9 october 2019 a la radunanza cumünela.

Dumandas da fabrica

La suprastanza cumünela piglia cugnuschentscha dals seguaints progets da fabrica:

- Parcella nr. 570 « Serlas parc », S-chanf, müdamaint da nüz temporer da la halla da parker

Impü aderischa la suprastanza cumünela seguaintas dumandas da fabrica:

- Chesa 47, renovaziun ed ingrandimaint
- Chapella 207C, nouv chesin d'üert
- Cinuos-chel, nouv Bungalow cun abitaziun integreda i'l plaun suotterraun (cun resalvas)

Conecssiun da credit per ün parc da suas

Duos persunas preschaintan a la suprastanza da la vschinauncha da S-chanf ün concept pella realisaziun e pella gestiun d'ün parc da suas a Prasüras – Plaun Spinatsch. Pella realisaziun e la gestiun dumandan els a la vschinauncha per ün imprast d'üna summa da fr. 150'000.00. Pell'ütisaziun dal terrain vain piglio in vista da fer giò üna cunvegna culs mneders da gestiun dal parc da suas da 5 ans. Üna prolungiaziun da la cunvegna dess esser pussibla.

La suprastanza cumünela beneventescha l'intenziun ed ho üna pusiziun fich positiva invers il concept. La suprastanza pretenda però tuottüna, cha'ls mainagestius hegian da chatter surtuot investuors privats pella realisaziun dal parc da suas.

Credit pel conduct d'ajer da la Resgia

Per pudair realiser la rait da distribuziun da l'ajer illa garascha ed ill'ufficina da la resgia ed impü eir illa garascha dal magazin forestel, decida la suprastanza cumünela da lascher fer las lavuors necessarias tres la firma Pinggera SA. Ils cuosts totels s'amuntan sün fr. 14'617.25. Ils cuosts vegnan scumpartieus sülla Resgia/lavuratori forestel e sül proget „Halla da deposit / Resgia arduonda“.

Surdeda da lavuors dal tet da l'Alp Pigniaint

Il tet da l'alp Pigniaint nun es pü intact. Tar trid oura plouva que aint in chadafö. Per na avair auncha dapü dans ans stu reparer il tet. Per quistas lavuors es gnieu piglio aint ün'offerta tar la firma Salzmänn a Zuoz. Ils cuosts s'amuntan sün fr. 5'114.25.

La suprastanza cumünela decida, cha'l tet stu gnir reparo e surdo l'incumbenza a l'intrapraisa Salzmänn a Zuoz per fr. 5'114.25 incl. ISP.

Trattativas Armausiusse

Già daspö lösch sun da sclarir differentas dumandas traunter la „Armasuisse“ e la vschinauncha da S-chanf. Dasper ün reglamaint da la parcella parciela nr. 305 pel ingradimaint da la deponia,

voul l'Armasuisse surlascher la lingia d'ova Flab – Bügls a la vschinauncha. Eir la via d'access tar la deponia Bos-chetta Plauna sün parcella nr. 305 dess gnir surpiglieda da la vschinauncha. La parcella culla via dess cumpiglier eir la paisa dals camiuns.

Ils 26 avuost 2019 ho gieu lö ün'ulterier inscunter traunter la vschinauncha e'ls rapreschantants da l'Armasuisse. Las propostas suotamissas da la vschinauncha vegnan evaluedas da l'Armasuisse.

Surdeda da lavuors piazza da Molocs Chapella

A Chapella es planiso ün nouv post da ramassamaint d'immundizchas cun Molocs. Uossa as tratta da la dumanda da surdeda da lavur per las lavuors d'impressari ed in regard ils Molocs. Quatter firmas haun inoltro in procedura directa offertas in questiu. Cul predschi il pü favuraivel ho inoltro la firma Angelini SA ün'offerta per als lavuors d'impressari scu eir per las lavuors da cuvrada da totel fr. 23'888.85 incl. ISP. Pünavaunt ho inoltro la firma Molok Recycling Company SA ün'offerta pels molocs cun ün import da fr. 26'721.00. Ils cuosts da proget s'muntan tenor il büdschet da la firma Indschegniers Caprez da Zernez in tuot a fr. 63'000.00.

La suprastanza surdo las duos incumbenzas tenor offertas a las firmas Angelini SA ed a la firma Molok Recycling Company SA.

Procedura da consultaziun – Ledscha da turissem e trafic public

Il sböz da la « Ledscha da turissem e trafic public » es publiched a per consultaziun daspö ils 21-08-2019 fin e cun ils 06-09-2019 sülla tevla naira e sülla pagina-web da la vschinauncha da S-chanf. Düraunt quist temp paun ils vschins e las vschinas da S-chanf inoltrer lur idejas e cumplettaziuns tar quista revisiun totela da la ledscha.

Zieva üna cuorta discussiun piglia la suprastanza cumünela cugnuschentscha da la revisiun totela da la ledscha surmanuzuneda, sainza avair formulà propostas da müdamaints.

Plan da termin tschernas cumünelas S-chanf

Las elecziuns cumünelas da quist utuon sinifichan üna granda sfida pell'administraziun. Il prüm scrutin vain fat insembel cullas elecziuns federelas.

La suprastanza piglia cugnuschentscha da la planisaziun da termins da las elecziuns cumünelas dals 20 october 2019 (1. scrutin) e dals 24 november 2019 (2. scrutin).

Lavuors da finischiun plan da quartier Chapella

Per las lavuors in connex cul plan da quartier Chapella ho fat il mner da proget, Liun Quadri, ün büdschet. Tar quistas lavuors as tratta da l'inverdimaint da las parcelas na surfabrichedas a Chapella. Il büdschet prevezza cuosts da fr. 16'284.25 incl. ISP per quista lavur.

La suprastanza es daperüna cull'intenziun e decida da realiser las lavuors.